

Pendekatan Sederhana dalam Menangani Isu Keganasan Rumah Tangga

RINGKASAN

Pada 13 Oktober 2017, sebuah artikel tulisan seorang Ustaz tempatan bertajuk 'Cara Urus Isteri Degil' telah diterbitkan oleh Berita Harian. Melalui ruangan terhad tersebut, penulisan itu hanya membincangkan satu sahaja penafsiran dalam mendidik isteri yang *nusyuz*. Pada masa yang sama, kes keganasan rumah tangga di kalangan masyarakat juga dalam keadaan amat membimbangkan. Oleh itu, pada 22 Februari 2018, Unit Pembangunan Kajian Pergas telah mengadakan sesi diskusi meja bundar yang kedua bertajuk 'Pendekatan Sederhana dalam Menangani Isu Keganasan Rumah Tangga' yang telah disampaikan oleh Ustaz Mohammad Yusri Yubhi Bin Md Yusoff. Sesi diskusi ini telah mengumpulkan sekumpulan asatizah dari pelbagai latar belakang, dan beberapa orang pengkaji hal ehwal masyarakat Melayu Islam Singapura.

SOROTAN

- Pendekatan sederhana dalam menafsirkan perkataan *dharb* telah mengiktiraf bahawa terdapat pelbagai penafsiran baginya. Sebahagian ulama menafsirkan *dharb* sebagai pukulan yang tidak mencederakan manakala sebahagian lain berpandangan ia membawa maksud lain seperti memutuskan hubungan dan menjauhkan diri dengan isteri.
- Islam tidak hanya membincangkan *nusyuz* dari pihak isteri. Ia turut membincangkan tentang *nusyuz* dari pihak suami.
- Golongan asatizah memainkan peranan penting dalam memberi panduan agama dan menangani isu keganasan rumah tangga. Sikap dan pandangan asatizah memberi kesan terhadap pemahaman serta tindakan masyarakat.
- Banyak saranan mengenai garis pandu yang boleh diambil kira oleh asatizah dalam menangani dan memberi panduan mengenai keganasan rumah tangga, seperti memahami konteks serta perkembangan dan norma masyarakat.

Pendekatan Sederhana dalam Menangani Isu Keganasan Rumah Tangga

PEMBENTANGAN

Ustaz Mohd Yusri memulakan pembentangan dengan mendefinisikan 'sederhana' sebagai membawa maksud wasatiyah iaitu sesuatu yang adil, terbaik, wasati di antara dua pendekatan, berhikmah dan mudah. Ustaz Mohd Yusri berkongsi beberapa statistik keganasan domestik yang dilaporkan di dalam tinjauan *United Nations' International Violence Against Women* pada tahun 2009 hingga 2010. Menurut tinjauan tersebut, 9.2% wanita di Singapura mengalami keganasan secara fizikal mahupun seksual. Kajian juga menunjukkan hanya 23% wanita di Singapura melaporkan keganasan domestik yang dialami. 6 dari 10 mangsa keganasan domestik pula mengalami keganasan secara berulang kali. Majoriti iaitu 83% dari responden berpandangan bahawa wanita perlu kekal dalam hubungan walaupun ia mengalamai keganasan domestik.

Di dalam pembentangannya, Ustaz Mohd Yusri menekankan bahawa *nusyuz* terbahagi kepada dua bahagian, iaitu *nusyuz* isteri dan juga *nusyuz* suami. Isteri yang *nusyuz*, menurut pandangan ulama tafsir adalah isteri yang tidak patuh terhadap perintah Allah, tidak taat kepada suami mahupun derhaka. Manakala suami yang *nusyuz* pula dijelaskan oleh ulama tafsir sebagai suami yang mengabaikan isteri, tidak memberi nafkah, memaki hamun serta memukul isteri.

Ruang perbincangan *nusyuz* juga sering terkait dengan isu dharb. Justeru Ustaz Mohd Yusri membincangkan perspektif ayat 34 dari surah al-Nisa' dengan lebih terperinci. Firman Allah s.w.t.

الرِّجَالُ قَوَّامُونَ عَلَى النِّسَاءِ بِمَا فَضَّلَ اللَّهُ بَعْضَهُمْ عَلَى بَعْضٍ وَبِمَا أَنْفَقُوا مِنْ أَمْوَالِهِمْ
فَالصَّالِحَاتُ قَانِتَاتٌ حَافِظَاتٌ لِّلْغَيْبِ بِمَا حَفِظَ اللَّهُ وَاللَّي تَخَافُونَ نَشُوزَهُنَّ
فَعِظُوهُنَّ بِمَا وَهَنَ فِي الْمَضَاجِعِ وَأَضْرِبُوهُنَّ فَإِنْ أَطَعْنَكُمْ فَلَا تَبْغُوا عَلَيْهِنَّ
سَبِيلًا إِنَّ اللَّهَ كَانَ عَلِيمًا كَبِيرًا ﴿٣٤﴾

¹ Ini berbeza dengan golongan bukan Islam yang berbeza pandangan dengan Muslim namun tidak memusuhi Islam.

Pendekatan Sederhana dalam Menangani Isu Keganasan Rumah Tangga

Ertinya: Dan perempuan-perempuan yang kamu bimbang melakukan perbuatan derhaka (*nusyuz*) hendaklah kamu menasihati mereka, dan (jika mereka berdegil) pulaukanlah mereka di tempat tidur, dan (kalau juga mereka masih degil) pukulalah mereka (dengan pukulan ringan yang bertujuan mengajarnya).

Melalui kajiannya, Ustaz Mohd Yusri mendapati bahawa para ulama berbeza pandangan mengenai maksud *dharb* di dalam ayat tersebut:

- Sebahagian ulama seperti Imam Ibn Kathir dan al-Qurtubi berpandangan bahawa ia bermaksud 'pukulan'. Namun 'pukulan' yang dimaksudkan di sini adalah tidak mencederakan dan merupakan langkah lanjutan selepas usaha didikan tidak berkesan. Bahkan di dalam mazhab Syafii contohnya, 'pukulan' hanya dibolehkan sekiranya ia mampu memberi didikan. Walau demikian, pilihan yang lebih baik adalah untuk meninggalkan 'pukulan'.
- Sebahagian ulama lain pula seperti Prof M. Quraish Shihab berpandangan ia bukan bermaksud pukulan. Sebaliknya mereka berpandangan ia membawa erti 'memutuskan hubungan, meninggalkan, memisahkan dan menjauhkan diri dari isteri'. *Dharb* dalam erti 'pukulan' tidak dipilih kerana ia tidak mencerminkan maksud perkahwinan ataupun perhubungan mesra dan mulia di antara suami isteri.

Justeru, penafsiran *wasati* adalah penafsiran yang mengiktiraf kewujudan kepelbagaian pandangan dalam maksud *dharb*. Penafsiran ini tidak menafikan wujudnya penafsiran *dharb* sebagai pukulan kerana sebab nuzul ayat dan hadis secara jelas menyatakan sedemikian rupa. Walau demikian, ia tidak boleh difahami dan diaplikasikan secara longgar dan sewenang-wenangnya dalam konteks kehidupan hari ini.

Ustaz Mohd Yusri berpandangan bahawa pendekatan yang lebih sesuai dalam konteks zaman sekarang dan sejajar dengan akhlak baginda Rasulullah s.a.w. adalah tidak memukul isteri.

Ustaz Mohd Yusri menekankan bahawa asatizah perlu jelas mengenai isu keganasan domestik dan pandangan ulama dari sudut perbincangan maksud 'pukulan'. Apabila dirujuk oleh masyarakat, asatizah juga

Pendekatan Sederhana dalam Menangani Isu Keganasan Rumah Tangga

digalakkan untuk bersikap empati, tidak bias dalam menghukum serta bijak dalam menyalurkan mereka kepada agensi yang bersesuaian.

Melangkah ke hadapan, asatizah boleh mempertimbangkan beberapa naratif dalam mendidik masyarakat Islam. Pertama, adalah memahami bahawa *nusyuz* bukan bagi isteri sahaja. Seterusnya adalah penekanan mengenai akhlak mulia Rasulullah s.a.w. yang tidak memukul serta kesantunannya dalam rumah tangga. Asatizah juga perlu menjelaskan tanggung jawab yang perlu dikongsi bersama antara suami isteri, selain menerangkan bahawa Islam melarang keganasan domestik.

PERBINCANGAN

1. Keganasan: Pengertian dan kitarannya

Perbincangan mengenai keganasan menyentuh dua perkara iaitu kitaran keganasan dan pengertian keganasan. Seorang peserta yang pernah bertugas dalam sektor sosial menjelaskan bahawa keganasan berlaku dalam sebuah kitaran. Kitaran ini merujuk kepada corak dan tren yang berlaku dalam hubungan yang ganas. Ia bermula dengan fasa berbulan madu di antara pasangan kemudian beralih kepada fasa pertengkaran dan ketegangan, di mana pendera mula marah dan bertindak agresif. Tindakan ini disusuli dengan rasa bersalah lalu pendera akan meminta maaf kepada pasangan. Apabila mangsa memaafkan pendera, maka hubungan akan kembali ke fasa berbulan madu dan kitaran ini berulang semula.

Terdapat peserta menekankan kepentingan memahami keganasan secara menyeluruh. Ia bukan sahaja bererti pukulan. Bahkan selain penderaan fizikal, ia juga boleh merangkumi penderaan secara lisan, emosi dan juga psikologi.

2. Peranan Asatizah dalam Isu Keganasan Rumah Tangga

Peserta turut memikirkan dan membincangkan peranan asatizah dalam hal keganasan rumah tangga. Peranan asatizah yang dibincangkan boleh dibahagikan kepada dua aspek; pendidikan dan respon.

Pendekatan Sederhana dalam Menangani Isu Keganasan Rumah Tangga

Dari sudut pendidikan, terdapat saranan agar isu *nusyuz* dan *dharb* ataupun keganasan rumah tangga dibincangkan di dalam silibus pendidikan Islam Singapura. Bahkan, beliau merasakan kepentingan bagi asatizah untuk menjelaskan pelbagai pandangan ulama yang wujud dalam isu tersebut kepada masyarakat. Terdapat beberapa saranan dari para peserta mengenai respon serta cara menangani isu keganasan rumah tangga. Salah seorang peserta merasakan bahawa seperti isu-isu lain, isu keganasan rumah tangga juga perlu ditangani melalui beberapa faktor, antaranya:

Faktor pertama adalah institusi yang memainkan peranan memberikan kefahaman kepada masyarakat. Melalui institusi kita boleh mendidik masyarakat mengenai keganasan rumah tangga.

Faktor kedua, di samping perbincangan agama, beliau menekankan kepentingan memahami serta membincangkan undang-undang dan dasar keganasan rumah tangga.

Perbincangan seterusnya banyak memberi tumpuan kepada respon asatizah terhadap masyarakat dalam persoalan isteri yang *nusyuz*. Respon asatizah bertindak sebagai panduan agama yang dirujuk dan dipegang oleh masyarakat. Ramai yang memberi penekanan tentang peranan asatizah dalam menghadapi isu ini. Salah seorang peserta membawa contoh kes di mana klien menjadikan al-Quran sebagai justifikasi bagi perbuatan keganasan mereka. Menurut pengamatan peserta ini, perbincangan akademik mengenai *dharb* adalah penting namun beliau merasakan bahawa masyarakat memerlukan jawapan yang jelas dan langsung mengenai *dharb*. Oleh kerana pandangan asatizah memberi kesan yang besar kepada masyarakat dan dipandang tinggi, justeru beliau menyarankan agar asatizah mengambil pendekatan menjelaskan secara jelas bahawa *dharb* tidak dibenarkan di dalam Islam. Walau bagaimanapun, Ustaz Yusri menyangkal pandangan ini, kerana ianya tidak sesuai dengan konteks Singapura yang berpelbagai pandangan mengenai isu *dharb* dan ini turut wujud di kalangan asatizah.

Sehubungan dengan itu, peserta lain menekankan tentang implikasi pandangan asatizah terhadap lakaran dasar dan undang-undang. Beliau merasakan bahawa masyarakat memandang tinggi terhadap panduan agama yang diberikan oleh asatizah. Justeru, beliau menggesa agar asatizah untuk bersikap lebih berani dalam memberi pandangan.

Pendekatan Sederhana dalam Menangani Isu Keganasan Rumah Tangga

Menyambut pandangan tersebut, seorang peserta menyarankan agar panduan agama yang diberikan juga perlu mengambil kira norma masyarakat dan juga dasar nasional. Dalam hal ini, pukulan bukan suatu norma dalam konteks masyarakat bertamadun sama ada Muslim mahupun bukan Muslim. Manakala keperluan mengambil kira dasar dan undang-undang negara juga adalah penting agar berlaku harmonization ataupun penyelarasan di antara hukum agama dengan undang-undang negara. Ini penting agar panduan agama mengetengahkan solusi bukan sahaja bagi masyarakat Islam, tetapi dapat juga diguna pakai oleh masyarakat umum.

Peserta lain menggaris bawahi profil dan demografi masyarakat, terutamanya profil golongan wanita, yang telah berubah. Mereka kini berpendidikan tinggi justeru memerlukan pendekatan yang berbeza. Konotasi panduan agama yang bersifat tradisional seperti 'jangan melawan kata suami, nanti dipukul' tidak sesuai lagi digunakan bagi masyarakat hari ini. Oleh itu, melangkah ke hadapan, asatizah disarankan agar mengambil kira perkembangan ini dalam memberi panduan agama.

Perbincangan ini perlu menghala kepada satu resolusi yang syumul. Asatizah perlu meneliti konteks masyarakat kini di mana hak asasi manusia dilaungkan, dan pukul bukan suatu norma bagi masyarakat bertamadun.

Selain itu terdapat pandangan bahawa perbincangan mengenai *nusyuz* seorang suami kurang mendapat perhatian. Berbeza dengan *nusyuz* seorang isteri yang dibincangkan al-Quran tentang cara mengatasinya, *nusyuz* seorang suami tidak dibincangkan secara langsung di dalam al-Quran. Justeru, beliau ingin tahu sekiranya terdapat perbincangan ulama dalam menghadapi suami yang *nusyuz*.

Terdapat juga pandangan yang merasakan bahawa isu utama adalah bertitik tolak dari konflik dalam rumah tangga. Oleh itu kita perlu mengetengahkan tentang cara menangani konflik. Kita boleh meneliti rangka kerja yang dilakarkan dalam bidang psikologi dan sains sosial tentang cara menangani isu rumah tangga dari segi komunikasi, kaunseling dan lain lagi. Dari sudut implikasi dasar pula, beliau menyuarakan agar asatizah perlu bertindak berani kerana pandangan asatizah mempunyai kesan kepada dasar di Singapura.

Pendekatan Sederhana dalam Menangani Isu Keganasan Rumah Tangga

KESIMPULAN

Isu keganasan domestik merupakan sebuah isu yang semakin mendapat perhatian di kalangan masyarakat. Perangkaan statistik bagi isu ini juga telah melonjak semasa fasa pandemik Covid-19 terhadap kehidupan sosial. Oleh itu, adalah penting bagi asatizah untuk membincangkan inisiatif dan usaha yang boleh dilakukan oleh asatizah untuk mengurangkan kes-kes keganasan rumah tangga.